

14/11/2003

Istilah 'militan Islam' beri gambaran buruk

Abdullah ME

MERUJUK laporan akhbar perdana Malaysia dan juga media elektronik pada 10 November lalu, saya ingin mempertikaikan penggunaan istilah "militan Islam".

Berikut adalah perenggan berkenaan: "Isnin lalu, anggota keselamatan Saudi menembak mati lima militan Islam dalam tembak menembak yang dikatakan cubaan menyerang umat Islam yang berada di Makkah."

Militan di dalam kamus bahasa Melayu bermaksud "sedia berjuang" atau "mengkritik dan menentang sesuatu pendapat". Saya juga merujuk kepada kamus Inggeris (kerana asal usul perkataan militan adalah dari perkataan Inggeris) dan maksud yang diberikan ialah "an organization or a person who is willing to use strong or violent action to achieve their political or social change".

Daripada itu, gabungan perkataan "militan Islam" akan membawa maksud "orang Islam yang menentang secara kekerasan". Apabila perkataan "militan Islam" disatukan pula di dalam ayat dengan gambaran aksi dan tingkah laku puak ini yang amat ganas, ia akan membawa mesej atau pendapat yang buruk mengenai orang Islam.

Saya berpendapat adalah tidak wajar untuk menggunakan perkataan militan dikaitkan dengan agama. Perkataan "militan Islam" yang digunakan memberi bayangan seperti wujudnya ajaran yang berunsurkan militan (penentangan secara ganas dan melampau) di dalam Islam.

Ini akan memberi gambaran yang amat terpesong daripada kebenaran. Perkara seperti inilah di antara penyebab agama Islam dipandang serong oleh masyarakat dunia. Orang beragama Islam pula dianggap militan.

Di negara asing, terutama di negara barat, Islam kini telah dianggap sinonim dengan terrorisme. Perkara yang tidak benar ini disebarkan oleh media melalui penggunaan perkataan seperti "pengganas Islam" atau "Islamic terrorist".

Malah bekas Perdana Menteri kita, Tun Dr. Mahathir sendiri pernah menegur media barat kerana mengaitkan perkataan pengganas dengan Islam.

Pihak media di Malaysia (media cetak mahupun elektronik) tidak sepatutnya menyebarkan perkataan seperti "militan Islam". Lebih-lebih lagi Malaysia adalah sebuah negara Islam yang dihormati, jika media kita sendiri menggunakan perkataan yang buruk seperti militan untuk disatukan dengan perkataan Islam, ini akan mencerminkan keburukan Islam dan seterusnya memburukkan agama rasmi negara kita.

Sedangkan di dalam ajaran Islam tidak pernah menyeru atau mengajak penganutnya melakukan kekejaman terhadap orang lain mahupun terhadap diri sendiri (contohnya: membunuh diri). Islam tidak bersetuju dengan sesuatu yang melampau, kesederhanaan adalah suatu nilai yang sentiasa diterapkan oleh Islam.

Oleh itu saya mencadangkan agar dicari istilah lain untuk menamakan kumpulan pelampau ini. Perkataan militan atau pengganas mungkin sesuai digunakan tetapi janganlah disusuli dengan perkataan Islam.

ABDULLAH ME,
Bandar Baru Bangi,
Selangor.